

五代會要

卷一百一十五

五代會要卷二十八

宋

王

溥

撰

諸色料錢下

後唐同光三年二月十五日租庸院奏諸道州縣官并防禦團練副使判官等俸料各據逐處具到事例文帳內點檢舊來支遣則例錢數不等所給折支物色又加錢數不定難爲勘會今除東京管內州縣官見支手支課錢且依舊外其三京併諸州於舊日支遣錢數等第重定則例兼切循本朝事體防禦團練副使判官外其

餘推官已下職員皆是本處自要辟請圓融月俸贍給亦乞依舊規繩省司更不支給錢物謹具如後防禦團練副使判官副使逐月料錢三十貫判官逐月二十貫刺史州元兼副使有者請廢其軍事判官所有月俸亦是刺史已俸內支贍三京少尹支料錢逐月三十貫赤縣令每月正受支料錢二十五貫考滿并攝比正官支一半主簿每月正授支料錢一十二千貫考滿并攝比正官支一半畿縣令每月正授支料錢二十千貫考滿并攝比正官支一半主簿每月支料錢一十

千貫考滿并攝比正官支一半司錄參軍每月正授支料錢一十三千貫考滿并差攝比正官支一半諸曹判司官每月正授支料錢一十二千貫考滿并差攝比正官支一半文學每月正授支料錢五千貫考滿并差攝比正官支一半參軍每月正授支料錢五千貫考滿并差攝比正官支一半諸州府錄事參軍各依逐州上縣令支州判司各依逐州上縣主簿支一萬戶已上縣令每月正授支料錢二十三千貫考滿并差攝比正官支一半主簿每月正授支料錢一十三千五百貫考滿并

差攝比正官支一半九千戶已上縣令每月正授支料
錢二十二千貫考滿并差攝比正官支一半主簿每月
正授支料錢一十二千貫考滿并差攝比正官支一半
八千戶已上縣令每月正授支二十一千貫考滿并差
攝比正官支一半主簿每月正授支一十一千貫考滿
并差攝比正官支一半七千戶已上縣令每月正授支
二十千貫考滿并差攝比正官支一半主簿每月正授
支一十一千貫考滿并差攝比正官支一半六千戶已
上縣令每月正授支一十九千貫考滿并差攝比正官

支一半主簿每月正授支一十千五百貫考滿并差攝
比正官支一半五千戶已上縣令每月正授支一十八
千貫考滿并差攝比正官支一半主簿每月正授支一
十千貫考滿并差攝比正官支一半四千戶已上縣令
每月正授支一十七千貫考滿并差攝比正官支一半
主簿每月正授支九千五百貫考滿并差攝比正官支
一半三千戶已上縣令每月正授支一十六千貫考滿
并差攝比正官支一半主簿每月正授支九千貫考滿
并差攝比正官一半二千五百戶已上縣令每月正授

支一十五千貫考滿并差攝比正官支一半主簿每月
正授支八千五百貫考滿并差攝比正官支一半二千
戶已上縣令每月正授支一十四千貫考滿并差攝比
正官支一半主簿每月正授支八千貫考滿并差攝比
正官支一半一千五百戶已上縣令每月正授支一十
三千貫考滿并差攝比正官支一半主簿每月正授支
七千五百貫考滿并差攝比正官支一半一千戶已上
縣令每月正授支一十二千貫考滿并差攝比正官支
一半主簿每月正授支七千貫考滿并差攝比正官支

一半五百戶已上縣令每月正授支一十一千貫考滿
并差攝比正官支一半主簿每月正授支六千五百貫
考滿并差攝比正官支一半五百戶已下縣令每月正
授支一十千貫考滿并差攝比正官支一半主簿每月
正授支六千貫考滿并差攝比正官支一半右租庸使
奏重定料錢則例如前如諸道舊有取田處今後不得
占留開破並依百姓例輸稅奉勅宜依
長興二年閏五月起居郎曹琛奏文武兩班或請假歸
寧或臥疾未頓才注班簿便住料錢伏乞特降勅命者

今後文武官請准歸寧假給及病疾者並許支給本官料錢其月二十四日勅諸道行軍司馬副使判官已下賓寮等考滿未得替人宜令並全支俸料元不在省司給俸者不在此例

清泰元年七月勅得王從璋涇王從敏每月各給料錢一百千米麥各五十石僦人衣糧各五十分馬十五匹

草粟

二土自方鎮入朝留洛陽私第故有是給賜

二年十月將作監丞龔封介國公宇文頡奏蒙恩龔封除官無龔爵俸給詔特給本官俸

晉天福六年二月勅諸衛上將軍逐月加俸錢二萬

漢乾祐三年七月十六日勅節文諸道州府令錄判官

主簿官令等第支與俸戶逐戶每月納錢五百與除二稅外免放諸襍差遣不得更種職田所定俸戶於中等無色役人戶內置不得差令當直及赴衙參如有闕額及不還明申州府差填不得衷私替換若是令錄判司主簿除本分人數外剩占俸戶及令當直手力更納料錢並許百姓陳告其陳告人與免戶下諸襍差徭所犯人追毀告身更加力役如令佐錄事參軍內有員闕州

府差攝亦依例支與俸錢差攝曹官不得一例供破定
例如後三千戶已上縣令逐月一十二千主簿六千二
千戶已上至三千戶已下縣令九千主簿五千一十戶
已下縣令六千主簿四千錄事參軍判司依本部內戶
口取最多縣分例支破其錄事參軍依縣令例判司依
主簿例

周廣順元年四月勅牧守之任委遇非輕分憂之務既
同制祿之數宜等官前有富庶之郡請給則優或邊遠
之州俸料數薄以至遷除之際擬議亦難既論資序之

高卑又患祿秩之升降宜分多益寡均利同恩冀無黨
偏以勸勸故今重定則例諸州防禦使料錢二百千祿
米百石食鹽五石馬十疋草粟元隨三十人衣糧團練
使料錢一百五十千祿粟七十石食鹽五石馬十疋草
粟元隨三十人衣糧刺史料錢一百千祿粟五十石食
鹽五石馬五疋草料元隨二十人衣糧仍取今年五月
一日後到任者依前定例支其已前在任者所請如故
顯德五年十二月中書奏諸道州府縣官及軍事判官
一例逐月各據逐處主戶等第依下項則例所定料錢

及米麥等收顯德六年三月一日後起支其俸戶並停廢一萬戶已上縣令逐月料錢二十千米麥共五石主簿料錢一十二千米麥共三石七千戶已上縣令逐月料錢一十八千米麥共五石主簿料錢一十千米麥共三石五千戶已上縣令逐月料錢一十五千米麥共四石主簿料錢八千米麥共三石三千戶已上縣令逐月料錢一十二千米麥共四石主簿料錢七千米麥共三石不滿三千戶縣令逐月料錢一十千米麥共三石主簿料錢六千米麥共二石五萬戶已上州司錄事參軍

及兩京司錄每月料錢二十千米麥共五石司戶司法每月料錢一十千米麥共三石三萬戶已上州司錄事參軍每月料錢一十八千米麥共五石司戶司法每月料錢八千米麥共三石一萬戶已上州司錄事參軍每月料錢一十五千米麥共四石司戶司法每月料錢七千米麥共三石五千戶已上州司錄事參軍每月料錢一十二千米麥共四石司戶司法每月料錢六千米麥共二石不滿五千戶州司錄事參軍每月料錢一十千米麥共三石司戶司法每月料錢五千米麥共二石諸

司軍事判官一例每月料錢一十千米麥共三石右諸州府京百司內諸司州縣官課戶莊戶俸戶柴炭紙筆戶等望令本州及檢田使臣依前項指揮勒歸州縣候施行畢具戶數奏聞仍差本州判官精細點數後差使臣覆視及有人論訴稱有漏落抵罪在本州判官及千係官典加今後更有人戶願充此等戶者便仰本州勒充軍戶配本州牢城執役從之

六年十二月詔諸道州府攝官起今後支給本所諸官俸錢之半

迴鶻

迴鶻本牙在天德西北娑陵水上距長安六千九百里唐天寶中安祿山犯闕有助國討賊之功累朝尚主自天驕會昌初其國爲黠戛斯所侵部族擾亂乃移帳至天德振武間又爲石雄劉沔所襲破之復爲幽州節度使張仲武所攻餘衆曲奔歸於吐蕃吐蕃處之甘州其後時通中國世以中國爲舅朝廷每賜書詔亦嘗以甥呼之

梁乾化元年十一月遣都督周易言等入朝進貢太祖

御朝元殿引對以易言爲右監門衛大將軍同正弟略
麥之石論思並爲左千牛衛將軍同正李犀珠安塩上
並爲右千牛衛將軍同正仍以左監門衛上將軍楊治
爲左驍衛上將軍充押領迴鶻還番使通事舍人仇立
通爲判官厚錫緡帛押領歸國又賜其入朝僧凝盧宜
李思宜延錢等紫衣

後唐同光二年四月其本國權知可汗仁美遣都督李
引釋迦副使田鐵林都監楊福安等共六十六人來貢
方物并獻善馬九疋莊宗召對於文明殿乃命司農卿

鄭質將作少監何延嗣持節冊仁美爲英美可汗至其
年十一月仁美卒其弟狄銀嗣立遣都督安干等來朝
貢狄銀卒呵咄欲立亦遣使來貢名馬

天成三年二月其權知可汗仁裕遣都督李阿山等一
百二十人入貢明宗召對於崇元殿賜物有差其年三
月命使冊仁裕爲順化可汗四年又遣都督製撥等五
人來朝貢製撥等懷化司戈遣令還

長興元年十二月遣使翟來思三十餘人進馬八十匹
玉一團四年七月復遣都督李末等三十人入朝進白

鶻一聯明宗復召對於廣壽殿厚加錫賚仍命解放其鶻

清泰二年七月遣都督陳福海已下七十人進馬三百六十疋玉二十團至八月勅廻鶻朝貢使密錄都陳福海可懷化郎將副使達奚相溫可懷化司階監使屈密錄阿撥可歸德司戈判官安均可懷化司戈

晉天福三年十月遣使都督李萬全等朝貢以萬全爲歸義大將軍監使雷福德爲順化將軍

四年三月又遣都督拽里敦來朝兼貢方物其月命衛尉卿邢德昭持節就冊爲奉化可汗貢良馬百疋白玉團白玉鞍轡等謝其封冊

漢乾祐元年五月遣使李屋等入朝貢方物並白玉藥物等七月以入朝使李屋爲歸德大將軍副使安鐵山監使朱相溫並爲歸德將軍判官翟毛歌爲懷化將軍周廣順元年二月遣使並麾尼貢玉團七十七白麀豹鼈牛尾藥物等先是晉漢已來廻鶻每至京師禁民勿私而易其所有寶貨皆中賣入官私下市易者罪之至是太祖命除去舊法每廻鶻來者私下交易官中更不

禁詰由是玉之價直十損七八

顯德六年二月又遣使朝貢獻玉并礪砂等物皆不納所入馬量給價錢時上以玉雖寶珍無益國用故因而却之

吐渾

吐渾本吐谷渾也唐咸通中酋長有赫連鐸者從太原節度使康承訓平徐方有功朝廷授振武節度使復盜據雲中後唐太祖逐之乃歸幽州李匡瀉其部族散居蔚州界立爲酋長其民不常有白承福者自同光初代

爲都督依中山地石門爲柵莊宗賜其額爲寧朔奉化兩府以都督爲節度使仍賜承福姓李名紹魯其畜牧就善水草丁壯常數千人羊馬生息入市中土朝廷常存恤之

後唐天成三年二月其都督李紹魯等遣使進馬一百二十疋明宗嘉之賜紹魯竭忠建策興復功臣金紫光祿大夫檢校太保至四年八月其首領念公山來朝貢其年十月別部首領薛冀堆進狀乞授嵐州刺史明宗在藩時常與冀堆有舊欲許之樞密使安重誨力諫乃

止長興元年三月竟以冀堆爲嵐州刺史仍賜名萬通
清泰三年二月以寧朔奉化兩府留後白可久超授檢
校司徒副使赫連海龍檢校尚書左僕射兩府大夫李
鐵置檢校尚書右僕射

晉天福元年高祖以契丹有助立之功割鴈門已北及
幽州之地以賂之由是吐渾部族皆隸於契丹其後苦
契丹之虐政部族皆怨之復爲鎮州節度使安重榮所
誘乃背契丹率車帳羊馬取五臺路歸國契丹大怒以
朝廷招納叛亡遣使責謂六年正月晉高祖命供奉官

張澄各率兵二千搜索并鎮忻代四州山谷中吐渾還
其舊地然亦以契丹誅求無厭心不平之命漢高祖出
鎮太原潛加撫慰其年五月其大首領白承福及磨里
念虎里赫連功德等來朝九月又遣首領白可久來朝
少主嗣位絕契丹之好數召其酋長入朝厚加錫宴每
大讌會皆命列坐於勛臣之次至開運中捍虜於澶州
召承福等率其部衆從行屬歲多暑熱部下多死復遣
歸太原移帳於嵐石州界然承福馭下無法多干軍令
其子族白可久名在承福之亞因牧馬率本帳北遁契

丹授以官爵復遣潛誘承福承福亦思叛去事未果漢祖知之乃以兵環其部族擒承福與族白鐵櫃赫連海龍等五家凡四百餘人伏誅藉其牛馬命別部長王義宗統其餘屬

奚

奚本匈奴別種卽東胡之地人物風族與突厥同族有五姓一曰阿瞢部管縣六二曰啜米部管縣四三曰粵質部管縣六四曰奴皆部管縣四五曰黑訖支部管縣三每部有刺史每縣有令酋長號奚王唐制兼饒樂府

都督居陰涼州東去營府五百里南去幽州九百里幽州置饒樂府長史一人以監之人馬約二萬後徙居琵琶川在幽州東北數百里出古北口地宜羊馬羊則純黑馬則前蹄堅善走以馳獵爲務逐獸高山自下而上其勢若飛語與契丹小異饜以平底瓦鼎煮糝爲粥旣飪以寒水解之而食每春借邊民之荒田種稼秋熟乃來持獲畢則窖於山下人莫知其處所以木爲碓斷椽爲臼所受不過一斗自天祐初契丹兵力漸盛室韋奚霫皆受制焉故奚之部族爲契丹代守邊土暨虜人虐

其首領去諸怨之以別部內附徙於媯州依北山而居
漸至數千帳故有東西奚之號去諸卒其子掃刺代立
後唐莊宗破幽州賜掃刺姓李名紹威

後唐同光元年十二月遣使朝貢三年九月以莊宗誕
節至遣使表貢方物

天成四年掃刺因剪爪傷乃卒其子素姑代立亦時遣
使入朝

清泰三年七月其首領達刺干遣通介老奏其王素姑
謀事叛欲附契丹已處置訖權知部落廢帝降詔以撫

慰之

晉天福元年高祖以契丹有助立之功割鴈門已北及
幽州之地以賂之由是奚之部族復隸於契丹自後常
爲契丹之所役屬開運三年十二月契丹犯闕其王拽
刺以所部兵屯於洛陽及虜主死隨衆北遁

臣甘立猷恭校

五代會要卷二十九

宋王溥

撰

契丹

契丹本鮮卑之種也居遼澤之中潢水之南遼澤去榆關一千一百二十里榆關去幽州七百一十四里其地東南接海東際遼河西北包冷陁北界松陁山川東西三千里地多松柳澤饒蒲葦其族本姓大賀氏後分爲八部一曰旦利皆部二曰乙室活部三曰實活部四曰納尾部五曰頻没部六曰內會雞部七曰集解部八曰

奚嗚部管縣四十一每部有刺史每縣有令酋長號契丹王唐制兼松漠府都督幽州置松漠府長史一人監之其後諸姓不常唐會昌中幽州節度使張仲武表其玉屈戌請賜印篆爲奉國契丹之印其八族長皆號曰大人稱刺史內推一人爲王建旗鼓以尊之每三年第其名以代之唐末有邪律阿保機者恃強好勇不受諸侯之代吞侵隣部兵力漸盛嘗與後唐太祖會盟於雲中結爲兄弟其後僭稱帝號以妻述律氏爲皇后燕人韓延徽爲宰相法令嚴明諸部皆畏伏之

梁開平元年四月遣其首領袍笏梅老等來貢方物至二年二月其主阿保機又遣使來貢良馬五月又遣使解里貢細馬十疋金花鞍轡貂鼠皮裘并冠男口一年十歲名曰蘇女口一年十一歲名曰譬其妻述律氏貢朝霞錦前國王欽德并其大臣皆有貢獻太祖命司農卿渾持右千牛衛將軍郎公遠充使就本國宣諭三年閏八月又遣首領葛祿來貢方物太祖御文明殿召葛祿等五十人張讌賜金帛有差至五年四月又遣使實柳梅老來朝貢

五代會要 卷五
後唐同光二年三月阿保機率所部入寇新城其年七月又率兵東攻渤海國至九月爲鄰部室韋女貞廻鶻所侵十二月又入寇嵐州三年二月復入寇幽州爲王師所敗俘其首領備多等其年五月又遣使拽鹿孟等來貢方物

四年正月阿保機復寇渤海國又遣梅老鞋里已下三十七人貢馬三十四匹詐脩和好

天成元年九月攻渤海國扶餘城下之命其長子突欲爲國主號東丹王其月二十七日阿保機得疾而死第

二子元帥太子德光嗣立德光本名曠屈之慕中國之名故改爲德光初阿保機有三子長號人皇王次號元帥太子次曰安端少君及阿保機死其妻述律氏令第二子元帥太子德光勾當兵馬令少子安端少君往渤海國代突欲將立爲嗣而元帥太子素爲部族所敬又其母述律氏亦常鍾愛故因而立之僞稱天顯元年尋葬阿保機於西樓番中地名僞諡大聖皇帝其年十月遣使設骨餒來告哀明宗輟其月十九日朝參以禮之其月僞平州守將領幽州節度使盧文進率戶口兵馬車帳

來降至二年十一月又遣使梅老等二十餘人朝貢兼
申和好之意明宗命飛勝指揮使安念德齎錦綺綾羅
及金花銀器寶裝酒器等賜之又賜其母述律氏繡被
一張并寶裝瓔珞至三年正月復入寇陷平州而去至
其年五月定州節度使王都叛命潛相連搆其王德光
遣首領禿餒率襍虜數千騎入定州至七月又遣首領
惕憊等率七千餘騎來援尋爲行營招討使王晏球等
逆戰破之勦戮甚衆餘黨復爲幽州節度使趙德鈞襲
之殺獲殆盡擒其首領惕憊等其月王晏球又獲契丹

絹書二封來進明宗命宣示羣臣莫有識其文字者契
丹本無文記唯刻本爲信漢人陷番者以隸書之半就
加增減撰爲胡書同光之後稍稍有之其年八月幽州
部送所獲番將惕憊已下六百餘人至京師明宗皆赦
之選其尤壯健者立爲契丹直其首領皆賜姓吉時言
事者以爲胡人悻戾不可置於君側俄而有首領吉趙
實自京遁歸奪船過河至深州捕獲斬之至其年閏八
月僞平州刺史張希崇來降四年三月定州行營招討
使王晏球擒禿餒等二十餘人獻於闕下悉命戮之

長興元年十一月契丹渤海東丹王突欲率番官四十餘人馬百疋自登州泛海內附明宗御文明殿召對及其部曲慰勞久之賜以衣冠金玉帶鞍馬錦綵器物等突欲進本國印三面宣示宰臣其年十二月中書門下奏契丹國東丹王突欲遠泛滄溟來歸皇化請賜姓名仍准番官入朝例安排謹按四夷入朝番官有懷德懷化歸德歸化等將軍中郎將名號又本朝賜新羅渤海兩番國主官初自檢校司空至太保今突欲是阿保機之子請比新羅渤海王例施行勅渤海國王人皇王突

欲契丹先收渤海國改爲東丹其突欲宜賜姓東丹名

慕華授光祿大夫檢校太保安東都護兼御史大夫上

柱國渤海郡開國公食邑一千五百戶充懷化軍節度

瑞慎等州觀察處置押番落等使

二年九月復姓李名贊華三年五月授滑

州節度使爲廢帝所殺

至二年其契丹王母述律氏其子突欲

歸國遣使朝貢明宗深慰納之至三年三月禮賓使梁

進德自契丹報聘迴稱其王請放蒞刺舍利還本國

蒞刺

亦定州所獲番將也

又請去年十二月十二日其王帳前有大星

晝隕聲若雷震其月又遣使鐵葛羅卿進馬三十疋亦

以放前刺歸國故也五月鐵葛羅卿迴明宗欲放前刺等令歸大臣爭之未決會幽州節度使趙德鈞上表論奏及易州刺史楊檀皆言不可遣其事乃止仍遣前骨舍利隨其使歸不欲全阻其請也其年七月又遣使都督述祿進馬三十疋

清泰三年五月晉高祖起義於太原九月官軍集於城下晉乃間道發使召德光爲爰是月德光率部落五萬餘騎至太原城下尋敗招討使張敬德楊光遠之兵降晉安大砦

晉天福元年十一月高祖踐位以德光有援助之力歆血爲盟結爲父子仍約歲輸絹十三萬匹割鴈門已北及幽州所屬縣並隸番界德光又率兵逐高祖於潞州繫幽州節度使趙德鈞并其子樞密使趙延壽而迴三年二月德光遣使子解里舍利梅老來聘三年十月又遣使來上尊號曰英武明義晉祖繼命宰臣馮道趙瑩劉昫等齎貨珍幣歲時進貢不絕德光亦遣名王已來至六年六月節度使安重榮執契丹使拽刺等以輕騎掠幽州之南界高祖累遣中使齎詔開諭以契丹有助

立之功不欲負其宿約而重榮奸險肆志竟誅拽刺等
馳檄天下言契丹之罪惡與襄州節度使安從進連謀
不軌高祖命杜重威率兵討之至貝州宗城縣相遇重
榮之衆大敗至七年正月二日收復鎮州斬重榮首漆
之送於契丹至其年四月高祖不豫少帝嗣立五月遣
使郎五來致吊兼獻衣服鞍馬等至十月又遣使大卿
已下二十六人來聘以高祖山陵有日致祭故也至九
年正月德光遣趙延壽趙延照等率兵五萬入寇貝州
少帝發兵屯守澶州初青州節度使楊光遠搆逆謀乃

繕治城隍蓄聚芻粟爲跋扈之計屬歲不稔饑殍相繼
朝廷以廩帑虛竭軍用不給仍發使郡縣括借民家資
財斛斗海內嗷嗷不堪其命光遠遂以重利誘德光入
寇又以趙延壽等皆中原人士常有思歸之意計羣匈
盜國晉祚不濟則天福在己其月德光自河間率諸部
兵入犯甘陵陷之巡檢使吳蠻投井而死河北大擾少
帝駐蹕澶州命宋州節度使高行周等將兵以禦之三
月德光自領襍虜十餘萬來攻戚城官軍拒之而退又
以趙延壽行魏博節度使改封魏王以延壽門人高融

爲節度副使統步奚及燕軍數萬營於南康四月又陷
德州博州其年十二月德光又率衆南下攻圍鎮州諸
邑皆陷之

開運二年二月前鋒至邢州鎮州節度使杜重威差人
間道告急少帝欲親率大軍渡河決戰乃命軍州節度
使張從恩等將兵合諸將之師屯於邢州時德光之衆
已及魏府建牙於元氏從恩等引軍而退其月又陷邢
州刺史沈斌死之至三月德光退杜重威等率兵攻契
丹之秦州下之迴及揚州爲德光精騎所圍諸將等決

力死戰德光大敗至三年八月契丹所部瀛州刺史僞
言納款少帝復命杜重威等率大軍迎降至十一月迴
及鎮州之東垣度與番相遇十二月六日遣前鋒奪橋
爲番軍所敗其月十日杜重威等以軍降於德光命相
州節度使張彥澤率漢騎二千先入京城至明年正月
一日德光自將大軍至京北百寮素服班於野次蒲伏
請罪皆命釋之尋降授少帝檢校太尉有義倭令挈其
族及將相近臣等於契丹黃龍府安置二月德光降僞
赦改國號大遼稱會同十年升鎮州爲中京以燕王趙

延壽為大丞相中京留守三月德光自京率眾北歸至四月十八日死於藥城其年五月宣遺制以永康王元欲襲其偽位永康王者東丹王突欲之長子元欲自以猶子不當嗣位且不奉祖母之命其諸部首領素畏述律氏之酷法復以阿保機死於渤海國被殺者百人今德光沒于漢地慮必獲罪如前同謀以其月二十一日領部族歸國述律氏歸於石橋番中地名其眾悉降於元欲命送述律氏於阿保機明殿以幽之阿保機陵寢謂之明殿偽改會同十年為天祿元年自稱天授皇帝

漢乾祐三年十一月元欲率騎數萬南寇陷邢州之內邱縣深州之就陽縣

周廣順元年正月太祖命左千牛衛將軍朱憲往修和好元欲亦遣使裹骨支報命獻良馬四疋太祖復命尚書左丞出敏供奉官蔣光遂銜命往聘至其年四月敏等迴元欲遣使實六獻碧玉金鍍銀裹鞍轡并馬四十四匹其月太祖又命左金吾將軍姚漢英右神武將軍華光裔往使至其年九月元欲為部下太寧王偉王子燕王述軌所殺述律德光之子勒所部誅太寧王述軌述律自

五代會要 卷三十一
立號天順皇帝改名璟偽稱應歷元年

顯德元年春太原劉崇將圖南寇述律氏番將楊衰率虜騎萬餘以助之三月世宗親征與崇戰於潞州高平縣之南原崇軍大敗番衆棄甲而遁二年三月命許州節度使王彥超等築壘於李晏口與番兵數千騎戰於安平縣之南敗之

党項羌

党項羌占析枝之地漢西羌之別種其地東至松州南接春桑述桑諸羌北連吐谷渾處山谷間亘三千餘里

種有數姓自爲部落一姓之中復分爲小部落有細封氏費聽氏析利氏野辭氏房當氏米禽氏拓枝最爲強族俗皆土著居有棟宇織毛罽以覆之其人多壽或至百五六十歲不事生業好爲盜竊前世或來朝貢自唐寶應正元之後皆率部族內附居慶州號東山部落居夏州號平夏部落會昌初命三使以統之

在寧延州界者命侍御史

崔彥邠魯主之在夏州者命侍御史李霄主之在靈武麟勝州者命侍御史鄭賀主之

後唐同光二年二月遣使朝貢十二月其首領簿備香來貢良馬

王仁會要 卷三
天成二年九月河西羌項如連山等來朝貢進馬四十疋

四年四月勅沿邊置場買馬不許蕃部至闕下自上御極已來党項之衆競赴都下賣馬常賜食於禁廷醉則連袂歌其土風凡將到馬無鴛良並云上進國家雖約其價直以給之然計其館給賜賚每年不下五六十萬貫大臣以爲耗蠹中原無甚於此因降勅止之雖有是命竟不能行其年九月首領折遇明等來貢方物十月首領來有行來朝進馬四十疋上御中興殿閱所進馬

樞密使安重誨奏曰吐渾党項近日相次進馬皆給價直對見之時別賜繒帛計其所費不啻倍價請止之以爲國家常苦馬不足每差綱收市今番言自來何費之有外番朝貢中國錫賜朝廷常事不以自止可番部羊馬不絕於路長興元年正月其首領來朝貢授萬德懷化司戈其年十二月以党項折家族五顛都知兵馬使折之正爲檢校尙書右僕射簿備家族都督簿備撤羅檢校工部尙書

二年正月首領折七移等進驪馬其年十二月又遣首

領來獻所奪得契丹旗號並馬等

三年正月以西路党項部族劫掠使臣及外域進奉命
邠州節度使藥彥稠靈武節度使康福等率步騎七千
往方渠顛已來討其叛命者其年二月行營邠州節度
使藥彥稠等奏誅党項阿埋三族韋悉袞勒疆賴埋厮
骨尾屈悉保等十七族七百餘人又率兵自牛兒族入
白魚谷追及背叛党項白馬慮家六族客戶三族獲大
首領連香八薩王都統悉邠埋摩侍御乞埋嵬悉逋等
六人兼黨類二千餘人獲持馬牛羊數千計至晚師還

野次其地無水軍士方渴俄有風雲自東而起是夜初
更降雪一尺軍中以為神助上令告捷使史萬山宣諭
軍中所獲牛羊等物各令士卒自取勿得收斂以進奉
為名

周廣順二年六月以府州党項泥也六族防禦使歸化
將軍泥香王子又泥也大首領拓拔山並為歸德將軍
三年二月慶州刺史郭彥欽奏党項野雞族掠奪商旅
請出兵討之時彥欽贖貨嗜其利以州地野雞族多羊
馬作法擾之番情獷悍屢不從順乃誣奏之太祖遣中

使贛詔撫安部族旣苦彥欽虐政不時報命遂詔邠州節度使折從阮合寧州刺史張建武兵進討之建武勇于立功徑趨野雞族追擊殺數十百人有喜王族折思族殺牛族彼無猜貳聞官軍討伐竟來餉餽官軍利其財貨皆劫掠之諸族乃相聚官軍至包山負險之地逆戰敗之投崖谷死者甚衆折從阮保兵而退太祖怒彥欽勒歸私第左遷建武爲率府率命前解州刺史鄭元昭爲慶州刺史以招撫之

于闐

于闐在京師西九千九百餘里西南帶葱嶺與婆羅門相接去三千餘里南與吐番接西北至疎勒國二千餘里國城之東有白玉河西有綠玉河次西有烏河其源同出於崑岡山去于闐西一千三百餘里每歲至七八月小水之後取玉於河謂之撈玉官取之後方許私取禁令甚嚴地多蒲萄醞而爲酒味極醇美其俗好事祆神唐正觀中其王伏闐信來朝復遣子入宿衛其後亦時來朝貢

晉天福三年九月其王李聖文遣使馬繼榮進白玉白

五代會要 卷三
毘犛牛尾紅鹽鬱合礪砂大鵬砂玉裝鞦轡等物其年
十月冊聖文爲大寶于闐國王命供奉官張匡鄴爲國
信使仍授入朝使馬繼榮爲鎮國大將軍扶風郡開國
公食邑二千戶副使黃門將軍國張載通試衛尉卿殿
頭承旨通事舍人吳順規試將作步監
漢乾祐元年五月復遣使朝貢六月以入朝使王知鐸
爲檢校司空副使張文達判官秦元寶爲檢校左右僕
射監使劉行立檢校兵部尚書

突厥

突厥之始前書載之備矣自號可汗猶古之單于妻號
可賀敦猶古之閼氏也子弟謂之特勒別部領兵者皆
謂之設其大官屈律啜次阿婆次頡利法次吐巾次俟
斤並代居其官而無員數父兄死則子弟襲其位北蕃
之中最爲強盛至唐室末爲諸番所侵部族微弱亦嘗
來朝貢

後唐天成二年正月其首領張慕晉朝貢

長興二年正月其首領杜阿熱來朝貢

晉天福六年七月其首領遣使薛同海已下一十七人

來朝貢

臣甘立猷恭校

五代會要卷三十

宋

王

溥

撰

吐番

吐番在長安西八千里本漢西羌之地其種落莫知所
出或云南涼禿髮利鹿孤之後其子孫以禿髮為國號
語訛訛謂之吐番國人號其王為普贊置大論小論以
統理國事無文紀刻木為約其國王與臣下一年一小
盟三年一大盟其俗隨畜牧不常其居然亦有城郭都
城號邏些城屋皆平頭貴人處於大毡帳謂之排盧不

知節候以麥熟為歲首唐貞觀中常來朝貢自後吞併諸番兵力日盛屢為邊患河西隴右之地悉為所取至

大中初其國亂朝廷復得六關之地至唐室末又為侵

據唐分天下為十道河西隴右三十三州京州最為大鎮土地沃壤人物繁庶開元天寶中置八監牧馬三十萬雜畜稱是其西復置安西都護府拒長安八千里

羈縻西番三十國軍鎮監務大小三百餘戍守之兵皆取涼州節度及安祿山犯闕肅宗在靈武盡召西河戍卒收復兩京吐番乘虛遂取西涼隴華人百萬陷於腥

膾開成之際朝廷遣使還番過京肅瓜沙城邑如故華人見漢旌使夾道泣訴問皇帝還念陷番生靈否當時

已經再世雖語言小訛而衣服未改至今涼州漢戶猶稱上代是鄯州戍卒每帥守關則請命於朝廷

梁開平二年正月遣使朝貢二月以吐番入朝使嗛未

首領杜論悉伽杜論心為左領軍衛將軍同正盟未蘓

論乞祿為右領軍衛將軍同正

乾化元年十一月又遣使來朝朝對於朝元殿賜金帛等遣之

後唐天成二年十一月遣使野利延孫等入貢并番僧

四人持番書二封人莫識其字

二年正月以入朝使野利延孫等六人並為歸德將軍

其年九月又遣使朝貢以入朝使閻薛羅等三人並為

歸德司戈十二月又以入朝使薛竭薛王子撥邇為歸

王仁會要 卷三
德郎將首領十人並爲歸化司戈

四年九月西涼府番官播心等來朝十月首領撥里忙布蘭邇等來朝並授歸德司戈

長興三年二月又遣使朝貢三月以朝貢使左鑲首領野利闕心爲歸德大將軍右廂首領錢心爲歸化郎將將軍廂首領李讀等並爲歸德司侯重云都督對兒六突兒維等並爲歸德司陞其年七月復遣使入朝引對於端明殿問本番牙帳去京師遠近對曰在涇州西二千里

四年十一月遣使來貢召對於內殿賜以金帛仍各賜虎皮一張

晉天福四年十月罷延族大首領聶褒郎曩麻標昌訶尤羅祇褒等率其族朝貢

周廣順二年九月河西節度使申師摩奏吐番首領折逋支等請加恩命其月勅以吐番左廂押番副使折逋枝右廂崔虎心並授銀青光祿大夫檢校工部尚書楊妃谷大首領沈念船授懷化大將軍左廂大首領錢千閏篤爲歸德大將軍沒林葛于凝盧伴邇折逋窮羅並

王仁會要 卷三
爲懷化大將軍右廂大首領鹿悉迦阿羅岳騷奴並爲
歸德大將軍沈念般糝與龍文溫光積並爲懷化大將
軍中廂首領岳阿西安九十並爲懷化大將軍又奏自
涇州安國鎮至西涼府沿路三處控扼各立州名欲補
大首領爲刺史又管邊界部落大首領三十餘人各賜
空名告身並從之

高麗

高麗本扶餘之別種其國都平壤城卽漢樂浪郡之故
地在京師東五千一百里東渡海至於新羅西北渡遼

水至于營州南渡海至于百濟北至靺鞨東西三千一
百里南北一千里其官大者號大對盧比一品總知國
事二年一代若稱職者不拘年限對盧已下官總十二
級置外州縣六十餘大城置傳薩一人比都督小城置
通使一人比刺史其下各有僚佐分曹掌事其王以白
羅爲冠白皮小帶咸以金飾其俗多淫祀事靈星可汗
箕子等神國城東有大隧名曰隧神常以十月王自祭
之俗好經書至于庶賤之家各有衢路造大屋謂之局
堂子孫晝夜讀書習射前王姓高氏世通中國常遣使

朝貢

後唐同光三年十一月遣使廣評侍郎上柱國韓申一副使春部少卿朴巖來貢方物至四年正月授韓申一朝散大夫試殿中監朴巖朝散郎試祕書郎

天成四年八月復遣廣評侍郎張昉等五十二人來朝貢銀香獅子銀鑪金裝銀鏤雲興刀劍馬匹金銀鷹絛鞞白紵白毡頭髮人參香油銀鏤剪刀鉗銀松子等

長興三年二月復遣使大相王儒來朝其年六月權知國事王監爲特進檢校太保使持節立菟州都督充大

義軍使兼御史大夫上柱國高麗國王七月又以其妻柳氏爲河東郡夫人

清泰二年十二月遣使禮賓卿邢順等來朝貢

三年正月以入朝使禮賓卿邢順試將作少監副使崔遠試少府監主簿其年又遣使王子太祖王規等來貢方物以太祖王規爲檢校尚書右僕射副使廣評侍郎崔禹試將作監其隨行節級等三十餘人並授司戈司

陸等職

晉天福三年八月清州奏高麗國宿衛質子王仁翟乞

放歸鄉里從之

四年九月復遣廣評侍郎邢順等七十二人來貢方物
六年八月其國王建爲開府儀同三司檢校太司使持
節立菟州都督充大義軍使高麗國王命國子博士謝
攀持節就冊之

八年復遣太子大相王申等來

開運元年正月以入朝使王子大相守倉部令上柱國
賜紫金魚袋王申一爲檢校尚書右僕射正朝守廣評
侍郎柱國丹金魚袋柳迥酬檢校禮部尚書守廣評郎

中韓李康試衛尉卿守廣評郎中朴玄信試太府少卿
守兵部主事韋安試將作監主簿以進奉賀登極使正
朝前守廣評侍郎柱國丹金魚袋金仁逢可檢校工部
尚書副使禮賓卿柱國丹金魚袋金裕可試大府卿判
官兵部郎中張規可試衛尉少卿

二年其國王王建卒其子武嗣位十月遣使廣評侍郎
朝立珪副使前禮賓卿金廉等一十八人來朝十二月
以權知高麗國事王武爲特進檢校太保使持節立菟
州都督充大義軍使兼御史大夫高麗國王仍命光祿

卿范光政太子洗馬張李凝就行冊命

王武者王建之子本國中大族國中推而爲主有智勇兵力日盛以兵并三韓百濟之地東夷君長最爲雄盛漢乾祐末王武死其子王昭代立

周廣順元年正月遣廣評侍郎徐逢等九十七人來朝貢二月以權知高麗國事王昭爲特進檢校太保使持節立菟州都督充大義軍使兼御史大夫高麗國王仍命衛尉卿劉皞通事舍人顧彥浦持節冊之劉皞尋卒於路顧彥浦溺海而死

二年九月復以太僕少卿正演借衛尉卿充高麗國冊禮使右衛率府呂繼贊借將作少監充副使

顯德二年十月復遣使王子大相王融來貢方物又遣廣評侍郎荀質來賀登極其年十二月授其國王王昭開府儀同三司檢校太師高麗國王

五年六月命尚書水部員外郎韓彥卿尚輦奉御金彥英使於高麗因命賚帛數千匹就彼市銅以備鑄錢之用

六年正月又遣其臣王子佐丞王兢佐伊王甫魏光等

貢名馬織成衣襖弓劍等其年八月遣使進別序孝經

一卷越王新義孝經八卷皇靈孝經一卷孝經雌圖三

卷

別序者記孔子所生及弟子從學之事新義者以越王為問日以什釋文之是非皇靈者止說延年辟災之事及志符文乃道書也雌圖者止說月之環暈星之孛孛乃識緯之書也

其年十一月遣

使貢銅五萬斤紫白水精各二千顆

渤海

渤海靺鞨本高麗唐總章中高宗平高麗徙其人散居中國置州縣于遼外就平壤城置安東都護府以統之至萬歲通天中契丹李榮反攻陷營府有高麗別種大

舍利乞乞仲象

大姓舍利官乞乞仲象名也

與靺鞨反人乞四比羽

走保遼東分王高麗故地則夫封乞四比羽許國公大

舍利乞乞仲象震國公乞四比羽不受命則天命將軍

李楷固臨陳斬之時乞乞仲象已死其子大祚榮繼立

併有比羽之眾勝兵丁戶四十餘萬保據挹婁故地至

聖歷中稱臣朝貢中宗命侍御史張行岌就往宣慰號

其都為忽汗州以祚榮為忽汗州都督封渤海郡王國

自稱渤海其俗呼其王為可毒失對面呼聖王賤表呼

基下父母老王曰大妃妻曰貴妃長子曰副王諸子曰

王子代以爲大酋終唐室朝貢不絕

梁開平元年五月其王大誣譏遣王子大昭順來貢方物至二年又遣殿中少令崔禮光來朝

三年三月遣其相大誠諤來朝兼貢女口

乾化二年五月又遣王子大光贊來朝貢方物太祖厚有錫賜

後唐同光二年正月遣王子大禹謨來朝五月又遣王子大元讓來朝莊宗賜金綵以遣之八月又遣姪學堂親衛大元謙試國子監丞

三年二月又遣使裴球貢方物進細女口五月以入朝使政唐省守和部少卿賜紫金魚袋裴球爲右贊善大夫

天成元年四月遣使大陳林等一百十六人來朝貢進男口女口各三人并人參隗布白附子等其年七月遣使大照佐等六人朝貢先是契丹大首領邪律阿保機兵力雄盛東北諸番多臣屬之以渤海國王土地相接常有吞併之志是歲率諸番部落攻渤海扶餘城下之改扶餘爲東丹府命其子突欲留兵鎮之未幾阿保機

王仁會要 卷三 九一
死渤海命其弟率兵攻扶餘城不能克保衆而退

四年五月又遣高正詞入朝貢方物七月以正詞爲太子洗馬

長興二年十二月遣使成文角來朝

三年正月又遣使來朝貢

四年七月以先入朝使成文角爲朝散大夫右神武軍長史奏事右錄事試大理評事高保又爲朝散郎右驍衛長史並賜金紫

清泰二年十二月遣使烈周道等入朝貢方物

三年二月以入朝使南海府都督列周道爲檢校工部尚書政堂省工部卿烏濟顯試光錄卿

周顯德元年七月渤海國崔烏斯多等三十人歸化

新羅

新羅弁之之苗裔其國在漢樂郎郡之地南東俱限大海西接百濟南隣高麗東西千里南北二千里有城邑村落其王所居曰金城周七八里衛兵三千人文武官凡十七等風俗刑法與高麗等同而朝服尚白人多金樸兩姓俗重元日相慶賀以是日拜日月之神婦人以

髮驍頭用綵及珠爲飾髮甚鬢美其王金真唐武德四年封樂郎郡王龍朔三年又以國爲雞林州授其王雞林州都督世以金氏爲酋長朝貢不絕

後唐同光元年十一月其王金朴英遣倉部侍郎金樂錄事參軍金幼卿來朝貢

二年六月又遣使朝散大夫倉部侍郎賜紫金岳來朝貢授金岳朝議大夫試衛尉卿

天成二年二月遣使張芬等來朝其年三月以新羅國權知康州事王逢規爲懷化大都軍新羅國前登州都

督府長史張希巖新羅金州知後官本國金州司馬李彥謨並檢校右散騎常侍其月又以入朝使中散大夫兵部侍郎兼賜紫金魚袋張芬爲檢校工部尚書副使兵部郎中朴述洪兼御史中丞判官倉部員外郎李忠式兼御史其年四月新羅國康州遣使林彥來朝貢詔對於中興殿賜物有差

四年二月青州奏於登州岸獲新羅船一隻進其寶貨長興二年四月權知國事金簿遣使金肫來貢方物清泰二年二月以入朝使執事侍郎金肫爲檢校工部

尚書副使司賓大卿李儒試將作少監

黑水靺鞨

靺鞨蓋肅慎之地後魏爲勿吉在京師東北六千餘里東至於海西接突厥南界高麗北鄰室韋其國凡爲數十部各有酋帥而黑水靺鞨最處北方尤矜勁健俗皆編髮性凶悍無憂戚貴壯而賤老俗無文字兵器有角弓楛矢唐開元十年三月安東郡都督薛泰諸於黑水靺鞨內置黑水郡以最大部落爲黑水府以其首領爲都督仍置黑水府長史一員部落監領之

後唐同光二年九月遣使兀兒來朝以兀兒爲懷化中郎將遣還番

三年五月黑水胡獨鹿遣使朝貢

天成四年八月遣使骨至來朝兼貢方物以骨至爲歸德司戈遣還番

長興元年三月其首領兀兒遣使朝貢

二年五月青州奏黑水兀兒部至登州賣馬

三年一月青州奏黑水桃李花狀申父胡獨鹿卒所有勅賜朱記未敢行使

南詔蠻

南詔蠻本烏蠻之別種在漢永昌之東姚州之西蠻俗謂王曰詔其先漢帥有六故號六詔各有君長不相統攝唐時中亦時來朝貢

後唐同光三年閏十二月魏王繼岌奏遣使賫書招諭

南詔蠻

時初平蜀川乃募會使南詔者有泰州副使徐

命嗣王龜年使雲南藹季父為副使藹為判官時不到阻羊城祇達善闈廻約為甥舅許降安化公主雲南使來迎公主使次服收復長安黃巢東走乃託以他歲而止

天成元年十月供奉官李彥楷高品李光裕雲南使廻

山後兩林百蠻都鬼主右武衛大將軍李卑晚差大鬼

主傅能阿花等來朝貢明宗御文明殿引對百官稱賀

時李卑晚為寧遠將軍大渡河南山前邛州六姓都鬼

主懷安郡王勿定標沙為定遠將軍

二年七月以左金吾衛將軍烏昭遠為左衛上將軍入

蠻國信使其年九月四川奏據黎州狀申雲南使趙和

於大渡河南起舍一間留信物十五籠并雜諸一卷遞

至闕下

以郭崇韜平蜀之後得王衍昔獲俘數千以天子命令使人入其部被止於界上唯國信與蠻

俘得往續有轉牒稱都督爽人和長國宰相命燮等上大人唐皇帝男奏疏一封自鶴拓歷至幾美台崖爽等

又入弄棟演習白鸚鵡邵騰裔爽等又入平夷新安寧
遠標沙差人轉送黎州其紙厚硬如皮筆力尤健有詔
本後有都爽弛着忍爽王保王寶都彌勒君爽董德義
都爽長垣忍爽緯楊布燮所署有彩牋一軸轉韻詩一
章章三韻其一聯有類擊筑詞頗有思本朝姻親之義
理亦不遜其籠中卽返其國信舊封猶存復命左衛上
將軍烏弼遠
往皆不能去

牂牁蠻

牂牁蠻其地北去兗州一百五十里東至辰州二千四
百里南至交州一千五百里西至昆明九百里無城郭
散居村落多霖雨稻皆再熟無徭役唯征戰之時乃相
屯聚刻木爲契其法劫盜者三倍還贓殺人者出牛馬

三十頭乃得賑死首領姓謝氏唐室頻遣使朝貢
後唐天成二年八月牂牁青州八郡刺史宋朝化等一
百五十人來朝貢進草豆穀二萬顆硃砂五百兩黃蠟
二百斤各賜官誥金帛遣之

昆明國

昆明部落在黔州西南三千里山路險阻住止高欄亦
有羊馬其俗椎髻跣足酋長披虎皮下者毡
後唐天成二年八月昆明大鬼主羅殿王普露靜王九
部落各差使等隨牂牁來朝貢

占城國

占城國在中國西南其地東西一百里南北三千里東暨海西暨雲南南暨臘國北暨驩州界東北至兩浙海行一月程其衣服制度大畧與大食國同所乘皆象馬粒食稻米肉食水兕山羊之類獸之奇者有犀牛鳥之珍者有孔雀前世多不與中國通

周顯德五年九月其國王因德漫遣其臣甫阿散等來貢方物中有灑衣薔薇水一十五瓶言出自西域凡水之露衣香而不斲又貢猛火油八十四琉璃瓶引對於

內殿賜以冠帶衣服等其表文以貝多葉檢以香木函其年十一月入朝使甫訶散金姿叵羅辭各賜繒帛有差仍命齎金銀器一千兩繒絲一千疋細甲名馬銀鞍勒等就賜其國王

雜錄

後唐天成元年六月十日御史臺奏伏覩今月三日入閣班退後方引對朝貢番使竊觀近制頗失常儀且月華門是宰相兩省近待官常朝來往之所外國番國朝見不合出此門而又殿廷班序先後退北者列其百辟

示彼四夷俾觀多士之羽儀以顯九重之嚴重豈可衆官退後番客方來合自正門直趨丹陛此是向來事例今辰忽有更張竊以方屬中興宜循舊典伏乞宣付中書門下重令參詳永爲定制奉勅宜令太常禮院檢舊例申奏者右太常禮院奏臣謹按開元禮以賓禮侍番客有六一番國王來朝二戒番王見日三番王奉見四受番使表及幣五宴番國王六讌番國使從開元定禮之後本朝故事對諸番客又並於內殿引對其殿名曰參殿事在禮賓使客省使不下外諸司見今施行不一

今例惟迴鶻番事則正殿引對况迴鶻見居甘州其地尤屬河西道涼州所管每遣使進表幣待以賓禮皇帝御正殿列百官府陳盛儀酌禮沿情事恐太重伏請今後准諸番客例祇於內殿引對不臨正朝兼免乖越又符故事謹且詳酌如前奉勅四夷來王歷代故事前後各因強弱撫制互有典儀大番頒示於威容則於正衙引對小番但推其恩信乃於內殿撫懷憲府奏論禮院詳酌皆徵故事咸有明文正衙威容未可全廢內殿恩澤且宜常行若遇大番入朝卽准舊儀於正殿鋪陳立

仗百官排班於正門引入對見

四年二月勅沿邊置場買馬不許番部至闕下

周廣順三年三月詔禁沿邊州城陳兵仗於諸番部



臣甘立猷恭校

